



五言古詩卷之十六

唐詩品彙十六

新寧高棟編

羽翼上

崔顥

唐殷璠云顥年少為詩名陷輕薄晚節忽變常調風骨凜然一窺塞垣說盡戎旅可與鮑照並駕也

古游俠 呈軍中 諸將

少年負膽氣好勇復知機
仗劍出門去孤城逢合圍
殺人遼水上走馬漁陽歸
錯落金鎖甲蒙茸貂鼠衣
還家且行獵弓矢速如飛
地迥鷹犬疾草深狐兔肥

腰間帶兩綬轉盼生光輝
願謂今日戰何如隋建威
雜詩

可憐青銅鏡掛在白玉堂
堂中有美女嬌弄明月光
羅袖拂金鵲綵屏點紅粧
粧罷含情坐春風桃李香
入若耶溪

輕舟去何疾已到雲林境
起坐魚鳥間動搖山水影
巖中響自蒼溪裏言彌靜
事事今人幽停橈向餘景

贈輕車

悠悠遠行歸經春涉長道
幽巽系始青洛陽蚕欲老
憶昨戍馬地別時心草草
烽火從北來邊城閉常早

平生少相遇未得展懷抱
今日杯酒間見君交情好

遊天竺寺

晨登天竺山山殿朝暘曉
厓泉爭噴薄江岫相縈繞
直上孤頂高平看衆山
小南州十二月地煖冰雪少
蒼翠滿寒山藤蘿覆冬沼
花龕瀑布側青碧石林杪
鳴鍾集人天施飯聚猿鳥
洗意歸清淨澄心悟空了
始知世上人萬物一何擾

贈王威古

三十羽林將出身常事邊
春風吹淺草獵騎何翩翩
插羽兩相顧鳴弓上新弦
射麋入深谷飲馬投荒泉

馬上共傾酒野中聊割鮮相看未及飲雜虜寇幽燕
烽火去不息胡山高際天長驅救東北戰解城亦全
報國行赴難古來皆共然

定襄郡獄

我在河東時使往定襄里定襄諸小兒爭訟紛城市
長老莫敢言太守不能理謗書隱几案文墨相填委
牽引肆中翁追呼田家子我來折此獄師聽一作辨
疑似小大必以情未嘗施鞭箠是時三月暮遍野農
桑起里巷鳴春鳩田園引流水此鄉多雜俗戎夏殊
音音顧問邊塞人勞情曷云已

陶翰

殷璠曰歷代人詩筆雙美者鮮矣今陶生
實謂兼之既多興象復備風骨三百年前
方可論其
體裁也

古塞下曲

進軍飛狐北窮寇勢將變日落塵沙昏背河更一戰
驛馬黃金勒彫弓白羽箭射殺左賢王歸奏未央殿
欲言塞下事天子不召見東出咸陽門哀哀淚如霰

燕歌行

請君留楚調聽我吟燕歌家在遼水頭邊風意氣多
出身爲漢將正值戎未和雪中凌天山冰上度交河

大小百餘戰封侯竟蹉跎歸來灞陵下故舊無相過
雄劍委塵匣空門唯雀羅劉云可感玉簪還趙妹瑤瑟付
齊娥昔日不爲樂時哉今奈何

經殺子谷

扶蘇秦帝子舉代稱其賢百萬猶在握可爭天下權
束身就一劍壯志皆棄捐塞下有遺跡千齡人共傳
疏蕪盡荒草寂歷空寒烟到此盡垂淚非我獨潛然

早過臨淮

夜來三渚風晨過臨淮島潮中海氣白城上楚雲早
鱗鱗漁浦帆泚泚蘆州草川路日浩蕩怒馬心如擣

且言任倚伏何暇念枯槁范子名屢移遽公志常抱
古人已云去此理今難道

望太華贈盧司倉

作吏列西華乃觀三峯壯戍削元氣中傑出天漢上
如有飛動色不知青冥狀巨靈安在哉厥跡猶可望
方此碩行旅未由飭仙裝葱隴記星壇明滅數雲障
良友垂真契宿心所微尚敢投歸山吟霞徑一相訪
晚出伊闕寄江南裴丞

退無宴息資進無當代策冉冉時將暮坐爲周南客
前登關塞門永眺伊城陌長川黯已暮千里寒氣白

家本渭水西異日何所適東志師禽尚微言祖莊易
一辭林壑間共繫風塵後才名忽先進天邑多紛劇
豈念嘉遁時依依偶沮溺

宿天竺寺

松柏亂岩口山西微徑通天開一峯見宮闕生虛空
正殿倚霞壁千樓標石叢夜來猿鳥靜鐘梵寒雲中
岑翠映湖月泉聲亂溪風心超諸境外了與懸解同
明發氣候改起視長崖東湖色濃蕩漾海光漸腫朦
葛仙跡尚在許氏道猶崇獨徃古來事幽懷期二公
出蕭關懷古

驅馬擊長劍行役至蕭關悠悠五原上永眺關河前
北虜三十萬此中常控弦秦城亘宇宙漢帝理旌旃
刀斗鳴不息羽書日夜傳五軍計莫就三策議空全
太漠橫萬里蕭條絕人烟孤城當瀚海落日照祈連
倉然苦寒奏懷哉式微篇更悲秦樓月夜夜出胡天

贈鄭員外

驄馬拂綉裳按兵遼水陽西分鴈門騎北逐樓煩王
聞道五軍集相邀百戰場風沙暗天起虜陳森已行
儒服揖諸將雄謀吞八荒金門來見謁朱紱生輝光
數載待御史稍遷尚書郎人生志氣立所貴功業昌

何必守章句終年事蒼黃同時獻賦客尚在東陵傍

贈房侍御時房公在新安

志人固不羈與道常周旋進則天下仰已之能晏然
褐衣東府召執簡南臺先雄義每特立犯顏豈啻全
謫居東南遠逸氣吟芳荃適會康廓趣清波更黃緣
扁舟入五湖發纜洞庭前浩蕩臨海曲迢遞濟江篇
徵竒忽忘返遇興將彌年乃悟范生知足明漁父賢
郡臨新安渚佳氣此城偏日夕對層岫雲霞映晴川
閑居戀秋色偃卧含貞堅倚伏自相化行藏亦推遷
君其振羽翮歲晏將冲天

劉春虛

殷璠曰春虛詩情幽典遠思苦語竒忽有所得便驚衆作頃東南高唱者數人然聲律宛然無出其右唯氣骨不建諸公自承明已還可傑立江表至如松色照空水經聲時有人滄溟千萬里日夜一孤舟歸夢如春水悠悠遠故鄉駐馬渡江處望鄉待歸舟道由白雲盡春與清溪長時有落花至遠隨流水香開門向溪路深柳讀書堂幽耿每白日清輝照衣裳並方外之言惜其不永天碎國寶

江南曲二

美人何蕩漾湖上風日長玉手欲有贈徘徊雙明璫
歌聲隨綠水怨氣起清揚日暮還家望雲波橫洞房
海上正搖落客中還別離同舟去未已遠送新相知

流水意何極，滿尊徒爾為。從來菊花節，早已醉東籬。
寄江滔求孟六遺文

南望襄陽路，思君情轉親。偏知漢水廣，應與孟家隣。
在日貪為善，昨來聞更貧。相如有遺草，一為問家人。

送東林廉上人還廬山

此詩見王昌齡集

石溪流已亂，苔徑入漸微。日暮東林下，山僧還獨歸。
常為爐峯意，况與遠公違。道性深寂寞，世情多是非。
會尋名山去，豈復無清機。

暮秋楊子江寄孟浩然

木葉紛紛下，東南日烟霜。林山相晚暮，天海空青蒼。

暝色况復久，秋聲亦何長。孤舟兼微月，獨夜仍越鄉。
寒笛對京口，故人在襄陽。咏思勞今夕，江漢遙相望。

潯陽陶氏別業

陶家昔先隱，種柳長江邊。朝夕潯陽郭，白衣來幾年。
霽雲明孤嶺，秋水澄寒天。物象自清曠，野荷何綿聯。
蕭蕭丘中賞，明宰非徒然。願守黍稷稅，歸耕東山田。

登廬山峯頂寺

孤峯臨萬象，秋氣何高清。庭際南郡出，林端西江明。
山門二緇叟，振錫聞幽聲。心照有無界，業懸前後生。
徒知真機靜，尚與愛網并。方首金門路，未遑叅道情。

尋東溪還湖中作

出山更回首日暮清溪深東嶺新別處數猿叫空林
昔遊初有跡此路還獨尋幽興方在往歸懷復為吟
雲峯勞前意湖水成遠心望望已超越坐鳴舟中琴
送韓平兼寄郭微

上客夜相過小童能沽酒即為臨水處正值鴈歸後
前路望鄉山近家見門柳到時春未暮風景自應有
余憶東州人經年別來久殷勤為傳語日夕念携手
兼問前寄書書中復達否

寄閻防

防時在終南
豐德寺讀書

青冥南山口君與緇錫隣深路入古寺亂花隨暮春
紛紛對寂寞往往落衣巾松色照空水經聲時有人
晚心復南望山遠情獨親應以脩往業亦惟立此身
深林度空夜烟月資清真莫嘆文明日彌年徒隱淪
海上詩送薛文學歸海東

何處歸且遠送君東悠悠滄溟千萬里日夜一孤舟
曠望絕國所微茫天際愁有時近仙境不定若夢遊
或見青色古孤山百里秋前心方杳渺後路勞夷猶
離別惜吾道風波敬呈休春浮花氣遠思逐海水流
日暮驪歌後永懷空滄洲

薛據

殷璠云據為人骨鯁有氣魄其文亦自傷不早達因著古興詩云投珠恐見疑抱玉但垂泣道在君不舉功成歎何及怨憤頗深至如寒風吹長林白日原上沒又孟冬時短晷日盡西南天可謂曠代之佳句

懷哉行

明時無廢人廣厦無棄材良工不我顧有用寧自媒
劉云英氣拂拂懷策望君門歲晏空遲迴秦城多車馬日夕
飛塵埃伐鼓千門啓鳴珂雙闕來我聞雷雨施天澤
罔不該何意斯人徒棄之如死灰主好臣必劾時禁
權不開俗流實驕矜得志輕草萊劉云可文王賴多士

漢帝資群才一言並拜將片善咸居台夫君何不遇
為泣黃金臺

冬夜寓居寄儲太祝

自為洛陽客夫子吾知音愛義能下士時人無此心
奈何離居夜巢鳥飛空林愁坐至月上復聞南陵砧

出青門往南山別業

舊居在南山夙駕自伊闕榛莽相蔽虧去爾漸超忽
散漫餘雪晴蒼茫季冬月寒風吹長林白日原上沒
懷抱曠莫伸相知阻胡越弱年好栖隱鍊藥在巖窟
及此離垢紛興來亦因物末路期赤松斯言庶不伐

登秦望山

南登秦望山極目大海空朝陽半蕩漾晃朗天水紅
溪壑爭墳薄江湖遞交通而多漁商客不悟歲月窮
振緡迎早潮弭棹候長風余本萍泛者乘流任西東
茫茫天際帆棲泊何時同將尋會稽跡從此訪任公

古興

日中望仙闕軒蓋揚飛塵鳴珂初罷朝自言皆近臣
光華滿道路意氣安可親歸來宴高堂廣筵羅八珍
僕妾盡紈綺歌舞夜達晨四時固相代誰能分要津
已看覆前車未見易後輪丈夫須兼濟豈能樂一身

君今皆得志肯顧憔悴人

初去郡齋書情

肅徒辭汝穎懷古獨凄然尚想文王化猶思巢父賢
時移多詭巧大道竟誰傳况見疾風起悠悠旌旆懸
征鴻無返翼歸流不停川已經霜雪下仍驗松柏堅
回首望城邑迢迢間雲烟志士不傷物小人皆自妍
感時唯責已在道非怨天從此適樂土東歸得幾年

西陵口觀海

淙江漫湯湯近海勢彌廣在昔坏渾凝融爲百川決
地形失端倪天色替滉漾東南際萬里極目遠無象

山影乍浮沉潮波忽來往孤帆或不見棹歌猶響像
日暮長風起客心空振蕩浦口霞未收潭心月初上
林嶼幾迴亭臯時偃仰歲晏訪蓬瀛真游非外獎

泊震澤口

日落草木陰舟徒泊江汜蒼茫萬象開合沓聞風水
洄沿值漁翁噉嘯逢樵子雲開天宇靜月明照萬里
早鴈湖上飛晨鐘海邊起獨坐嗟遠遊登岸望孤舟
零落星欲盡腫臄氣漸收行藏空自秉智識仍未周
伍胥既伏劍范蠡亦乘流歌竟鼓楫去三江多客愁

崔署

殷璠云署詩多嘆詞要妙情意悲涼送別登樓俱堪下淚

山下晚晴

窠窠遠天靜溪路何空朦斜光照踈雨秋氣生白虹
雲盡山色暝蕭條西北風故林歸宿處一葉下梧桐

潁陽東溪懷古

靈溪氛霧歇皎鏡清心顏空色不映水秋聲多在山
世人久踈曠萬物皆自閑白鷗寒更浴孤雲晴未還
昔時讓王者此地閉玄關無以躡高步淒涼岑壑間

送薛據之宋州

無媒嗟失路有道亦乘流客處不堪別異鄉應共愁

我生早孤賤淪落居此州風土至今憶山河皆昔遊
一從文章士兩京春復秋君去問相識幾人今白頭

早發交崖山還太室作

東林氣微白寒鳥急高翔吾亦自茲去北山歸草堂
杪冬正三五日月遙相望肅肅過潁上隴隴辨夕陽
川冰生積雪野火出枯桑獨往路難盡窮陰人易傷
傷此無衣客如何蒙雨霜

登水門樓見亡友張真期題望黃河作因

以感興

吾友東南美昔聞登此樓人隨川上去書向壁中留

巖子好真隱謝公躄遠遊清風初作頌煖日復消憂
時與交友古迹將山水幽已孤蒼生望坐見黃河流
流落年歲晚悲涼物已秋天高不可問掩淚赴行舟

宿大通和尚塔敬贈如闍黎廣心長孫錡

二山人

英華作宿大和尚塔贈如上人兼
呈常孫二山人

支公已寂滅塔影山上古更有真僧來道場救諸苦
一承微妙法寓宿清淨土身心能自新色相了無取
森森松映月漠漠雲近戶嶺外飛電明夜來前山雨
燃燈見棲鴿作禮聞信鼓曉霽南軒開秋華淨天宇
願言長出世謝爾及申甫

李嶷

殷璠云嶷詩鮮淨有規矩其少年行
三首詞雖不多翩翩然逸意在目也

少年行三首

十八羽林郎戎衣事漢王
臂鷹金殿側挾彈玉輿傍
馳道春風起陪遊出建章

侍獵長揚下承恩更射飛塵生
馬影滅箭落鴈行稀
薄霧隨天仗聯翩入鎖闈

玉劍膝邊橫金盃馬上傾
朝遊茂陵道夜宿鳳凰城
豪吏多猜忌毋勞問姓名

林園秋夜作

林卧避殘暑白雲長在天
賞心既如此對酒非徒然
月色徧秋露竹聲兼夜泉
涼風懷袖裏茲意與誰傳

淮南秋夜呈同僚

天淨河漢高夜聞砧杵發
清秋忽如此離恨應難歇
風亂池上萍露光竹間月
與君共遊處勿作他鄉別

綦毋潛

殷璠云潛詩屹峭舊善寫方外之情至
如松覆山殿冷不可多得又塔影挂清漢
鐘聲和白雲歷代未有荆南
分野數百年來独秀斯人

題招隱寺綦公房

開士度人久空巖花霧深
徒知燕坐處不見有為心

蘭若門對壑田家路隔林還言澄法性歸去比黃金

宿太平觀

夕到玉京寢宵冥雲漢低魂交仙室蝶曙聽羽人鷄
滴瀝花上露清冷松下溪明當訪真隱揮手入無倪

春泛若耶

幽意無斷絕此去隨所偶晚風吹行舟花落入溪口
際夜轉西壑隔山望南斗潭烟飛溶溶林月低向後
生事且瀟漫願為持竿叟

題鶴林寺

道門隱形勝向背臨層霄松覆山殿冷花葢溪路遙

珊珊寶幡掛焰焰明燈燒暹日半空谷春風連上潮
少憑水木興暫忝身心調願謝携手客茲山禪誦饒

題棲霞寺

南山勢迴合靈境依此住殿轉雲崖陰僧探石泉度
龍蛇爭翕習神意皆密護萬壑奔道場群峯向雙樹
天花飛不着水月白成路今日觀身我歸心復何處

王灣

殷璠云灣詞翰早著為天下所稱最者不
過一二遊吳中作如搗衣篇云月華照杵
空隨妾風響傳砧不到君所有衆製成類
君斯非張蔡之未見覺顏謝之遠乎
晚夏馬嵬卿叔池亭即事寄京都知已

忝職畿甸淹濫陪時俊後才輕策疲劣勢薄常驅走
牽役勞風塵秉心在巖藪宗賢開別業形勝代希偶
竹繞清渭濱泉流白渠口逡巡期賞會揮忽變星斗
逮此乘務閑因而訪幽叟入來殊景物行得洗紛垢
林靜秋色多潭深月光厚盛香蓮近折新味瓜初剖
滯拙懷隱淪書之寄良友

奉使登終南山

常愛南山遊因而盡原隰數朝至林嶺百仞登
鬼岌石狀馬經窮苔色步綠入物竒春貌改氣遠天香集
虛洞策杖鳴低雲拂衣濕倚巖見廬舍入戶欣拜揖

問姓矜勤勞示心教澄習玉英時共飯芝草為余於
境絕人不行潭深鳥空立一乘從此授九轉兼是給
辭處若轉飛憇來唯吐吸開襟超已勝迴路忽而及
煙色松上深水流山下急漸平逢車騎向晚睨城邑
峯在野趣繁塵飄宦情澁辛苦久為吏榮進何妄執
日暮懷此山悠然賦新什

崔國輔

殷璠云國輔詩婉變清楚深宜
諷咏樂府數章古人不及也

雜詩

逢着平樂兒論交鞍馬前與酣一斗酒恰用十千錢

後余在關內作事多迍邅何肯相救援徒聞寶劍篇

從軍行

塞北胡霜下營州索兵救夜夜偷道行將軍馬亦瘦
刀光照塞月陣色明如晝傳聞賊滿山已共前鋒鬪

題豫章館

楊柳映春江江南轉佳麗吳門淶波裏越國青山際
遊宦常往來津亭暫臨憇驛前蒼石沒浦外湖沙細
向晚宴且久孤舟罔然逝雲留西北客氣歇東南帝
獨有萋萋心誰知怨芳歲

石頭瀨作

悵矣秋風時余臨石頭瀨日高見超遠望盡北州內
羽山數點青海岸雜光碎離離樹木少泚泚波潮大
日暮千里帆南飛落天外須臾遂入夜楚色有微靄
尋遠跡已窮遺榮事多昧一身猶未理安得濟當代
且泛朝夕潮荷衣蕙為帶

漂母岼

泗水入淮處南邊古岼存秦時有漂母於此飯王孫
王孫初未遇寄食何足論後為淮陰侯誓欲答母恩
事跡貴在此空傷千載冤前臨雙小渚上有一孤墩
遙望淮陰口蒼蒼烟樹昏幾年崩塚色每日落潮痕

古地多陘阨時哉不敢言
向昔淚沾裳只宿蘆洲村

張謂

送僧

童子學脩道誦經求出家
手持貝多葉心念優曇花
得度北州近隨緣東路賒
一身求清淨百毳納袈裟
鐘嶺更飛錫炉峯期結跏
深心大海水廣願恒河沙
此去不堪別彼行安可涯
殷勤結香火來世上牛車

讀後漢逸人傳二首

子陵沒已久讀史思其賢
誰謂潁陽人千秋如此肩
嘗聞漢光武曾是曠周旋
名位苟無心對君猶可眠

東過富春渚樂此佳山川
夜卧松下月朝看江上烟
釣時如有待釣罷應忘筌
生意在林壑悠悠經暮年
于今七里灘遺跡尚依然
高臺竟窳窳流水空潺湲

又

龐公南郡人家在襄陽
里何處偏來往襄陽東
陂是誓將業田種終得保
妻子何言二千石乃欲勸
吾仕鶴鵲巢茂林鼃鼃穴
深水萬物從所欲吾心亦
如此不見鹿門山朝朝白
雲起采藥復采樵優游終
莫齒

同孫構免官後登薊樓

昔在五陵時年少心亦壯
常矜有竒骨必是封侯相

東走到營州投身事邊將一朝去鄉國千載履亭障
部曲皆武夫功成不相讓猶希虜塵動更取林胡帳
去年大將軍忽負樂生謗北別傷士卒南遷死炎瘴
濩落悲無成行登薊丘上長安三千里日夕西南望
寒沙榆塞沒秋水灤河漲策馬從此辭雲山保閑放

盧象

殷璠云象雅而不素有體得國士之風
曩在校書名充祕閣其曰吳越山最秀新
安江更清盡
東南之數郡

家叔徵君東溪草堂

關山十餘里青壁森相倚欲識堯時天東溪白雲是

雷聲轉幽壑雲氣香流水澗影生龍蛇巖端翳檉梓
大道終不易君恩曷能已鶴羨無時老龜言攝生理
浮年咲六甲元化潛一指未暇掃雲梯空慙阮家子

又

今朝共遊者得性閑未歸已到仙人家莫驚鷗鳥飛
水深巖子釣松掛巢父衣雲氣轉幽寂溪流無是非
名理未足羨腥臊謳所希自惟負貞意何歲當食薇

贈呈秘書

客自岐陽來吐音若鳴鳳孤飛畏不偶獨立誰見用
忽從被褐中召入承明宮聖人借顏色言事無不通

殷勤拯黎庶感激論諸公將相猜賈誼留書歸馬融
顧今又寂寞一歲麒麟閣且共歌太平勿嗟名宦薄

送綦毋潜

夫君不得意本自滄海來高足未云騁虛舟空復回
淮南楓葉落灞岸桃花開出處暫為間浮沉安繫哉
如何天覆物還遣世遺才欲識秦將漢嘗聞王與裴
離筵對寒食別雨乘春雷會有辟書至荷衣莫謾裁

鄉賦後自鞏還田家隣友見過之作

鷄鳴出東邑馬倦登南岫落日見桑柘翳然丘中寒
隣家多舊識投暝來相看且問春稅苦兼陳行路難

園場近陰壑草木易凋殘峰晴雪猶積澗深冰已團
浮名知何用歲晏不成歡置酒共君飲當歌聊自寬

祖咏

殷璠云咏詩剪刻省靜用思尤苦氣雖不
高調頗凌俗至如霽日園林好清明煙火
新亦可稱為才子也○咏有歸汝墳庄別
盧象云漚麻入南澗刈楚向東菑對酒鷄
黍熟閉門風雪時又度淮河寄武平一云
天色混波濤岸陰匝林墅等句見僧皎然
詩式

夕次圃田店

前路入艷郊向經百餘里馬煩時欲歇客歸程未已
劉云景落日桑柘陰遙林煙火起西還不遑宿中夜
情自然

渡京水

田家即事

舊居東皋上左右俯荒村樵路前傍嶺田家遙對門
懽娛始披拂愜意在郊原餘霽蕩川霧新秋仍晝昏
攀條憇林麓引水開泉源稼穡豈云倦棄麻今正煩
方求靜者賞偶與潛夫言雞黍何必具吾心知道尊

古意

夫差日淫放舉國求妃嬪自謂得王寵代間無美人
碧蘿象天閣坐輦乘芳春宮女數千騎常遊江水濱
年深玉顏老時薄花粧新拭淚下金殿嬌多不顧身

生前妬歌舞死後同灰塵塚墓令人哀哀於銅雀臺

玉季友

殷璠云季友詩愛奇務險遠出常情之外然而白首短褐良可悲夫

別李季友

栖鳥不戀枝喈喈在同聲行子馳出戶依依主人情
昔時霜臺鏡醜婦羞爾形閉匣二十年皎潔猶常明
今日照離別前途白髮生

雜詩

采山仍采隱在水不在深持斧事遠遊固非匠者心
翳翳青桐枝樵爨日所侵斧聲出巖壑四聽無知音

豈為鼎下薪當復堂上琴鳳鳥久不棲且與枳棘林

山中贈十四秘書兄

出山秘芸署山色已再春食我山中藥不憶山中人
山中誰余密白髮日相親雀鼠晝夜無知我厨廩貧
有情盡捐棄土石為周身依依舍北松不厭吾南隣
夫子質千尋天澤枝葉新今以不材壽非智免斧斤

滑中贈顧高士瓘英華作崔高士

夫子保藥命外身得無咎日月不能老化暢為筋不
十年前見君甲子過我壽于何今相逢華髮在我後
近而知其遠少見今白首遙信蓬萊宮不死世世有

玄石采盈檐神方秘其耐問家唯指雲愛氣常言酒
攝生固如此履道當不朽未能太玄同願亦天地久
實腹以芝朮賤形仍芻狗自勉持贈君良藥在苦口

賀蘭進明

殷璠云好古博遠經籍滿腹其所著述一百餘篇頗究天人之際又古詩十八首大

古意

崇蘭生澗底香氣滿幽林采采欲為贈何人是同心
日暮徒盈把徘徊幽思深慨然紉雜佩重奏丘中琴

又

秦庭初指鹿群盜滿山東忤意皆誅死所言誰肯忠
武關猶未啓兵入望夷宮爲崇非涇水人君道自窮

閻防

殷璠云防爲人好名博雅其警策語多真素至如荒庭何所有老樹半空腹又能挂庭中樹龍蒸棟裏雲皎然可信也

宿岸道人精舍

早歲參道風放情入窠廓重經因息侶遂果巖下諾
歛迹辭人間杜門守窅冥秋風剪蘭蕙霜氣冷淙壑
山牖見燃燈竹臼聞搗藥願言拾塵事所趣非龍獲

秋晚石門禮拜

輕策凌絕壁招提謁金仙舟車無遊徑崖嶠乃屬天
躑躅淹異景夷猶望新弦石門變暝色谷口生人烟
陽鴈嗷平楚秋風急寒川馳暉苦代謝浮翠輦貞堅
永欲卧丘壑息心依梵筵誓將歷劫願無以物外牽

百丈溪新理茆茨

浪迹棄人世還山自幽獨始傍巢由蹤吾其獲心曲
荒庭何所有老樹半空腹秋蛸鳴北林暮鳥穿我屋
棲遲樂遵渚恬曠寡所欲開卦推盈虛散帙攻節目
養閑度人事達命知止足不學東國儒俟時勞伐輻

夕次鹿門山

龐公嘉遁所浪迹難追攀浮舟暝始至抱杖聊自閑
雙闕開鹿門百谷集珠灣噴薄湍上水春容漂裏山
進原不足險梁壑未成艱我行自春仲夏鳥忽綿巒
蕙草色已晚客心殊倦還遠遊非避地訪道愛童顏
安能循機巧爭奪錐刀間

五言古詩卷之十六

唐詩品彙十六

五言古詩卷之十七

唐詩品彙十七

新寧高棟編

羽翼下

蕭華

侍從迴鑾應制

粵在秦京口議乎封禪難豈知陶唐主道濟蒼生安
惟彼烈祖事增脩寔榮觀聲名朝萬國玉帛禮三壇
纂聖德重光建元功載刊仍開舊馳道不記昔迴鑾
羽衛搖晴日弓戈生早寒猶思檢玉處却望白雲端
崔宗之

贈李十二

涼風八月白露空園亭耿耿意不暢稍稍風葉聲
思見雄俊士共談今古情李侯忽來儀把袂苦不早
清論既抵掌玄談又絕倒分明楚漢事歷歷王霸道
擔囊無俗物訪古千里餘袖有七首劍懷中茂陵書
雙眸光照人詞賦凌子虛酌酒弦素琴霜氣正凝潔
平生心中事今日為君說我家有別業寄在嵩之陽
明月出高岑清溪貞素光雲散窓戶靜風吹松桂香
子若同斯遊千載不相忘

魏萬

金陵酬李翰林謫仙子

君抱碧海珠我懷藍田玉各種希代寶萬里遙相燭
長卿慕蘭父子猷意已深平生風雲人暗合江海心
去秋忽乘輿命駕來東土謫仙遊梁園愛子在鄒魯
二處一不見拂衣向江東五兩掛海月扁舟隨長風
南遊吳越徧高揖二千石雪上天台山春逢翰林伯
按李詩云回棹楚江濱揮策揚子津身著日本裘昂
藏出風塵五月造戎語知非佞人與此春逢不同
宣父敬項橐林宗重黃生一長復一少相看如弟兄
惕然意不盡更逐西南去同舟入秦淮建業龍盤處
楚歌對吳酒借問承恩初宮買長門賦天迎駟馬車

才高世難容道廢可推命安石重携妓子房空謝病
金陵百萬戶六代帝王都虎石據西江鐘山臨北湖
二山信為美王屋人相代應為岐路多不知歲寒在
君遊早晚還勿久風塵間此別未遠別秋期列仙山

張潮

江風行

胥貧如珠玉胥富如埃塵貧時不忘舊富日多寵新
妾本富家女與君為偶匹惠好亦何深中門不魯出
妾有綉衣裳歲蕤金縷光念君貧且賤易此從遠方
遠方三千里思君心未已日暮情更來空望去時水

孟夏麥始秀江上多南風商賈歸欲盡君今向巴東
巴東有巫山窈窕神女顏常恐遊此方果然不知還

裴迪

山寺

靈境信為絕法堂出塵氛自然成高致向下看浮雲
迤邐峰岫列參差間井分林端遠堞見風末踈鍾聞
吾師父禪寂在世超人群

丘為

題農父廬舍

東風何處至已綠湖上山湖上春已早田家日不閑

溝塍流水處未耜平蕪間薄暮飯牛後歸來還閉關
泛若耶溪

結廬若耶裏左右若耶水無日不釣魚有時向城市
溪中水流急渡口水流寬每得樵風便往來殊不難
一川草長綠回時那得辨短褐衣妻兒餘糧及雞犬
日暮鳥雀稀稚子呼牛歸住處無隣里柴門獨掩扉
尋西山隱者不遇

絕頂一茆茨直上三十里叩關無僮僕窺室唯按几
若非巾柴車應是釣秋水蹉跎不相見繩俛空仰止
草色新雨中松聲晚窓裏及茲契幽絕自足盪心耳

雖無賓主意頗得清淨理興盡方下山何必待之子

湖中寄王侍御

日日湖水上好登湖上樓終年不向郭過午始梳頭
賞亦愛杯酒得無相獻酬小童能膾鯉少妾事蓮舟
每有南海信仍期後月遊方春轉搖蕩孤嶼時淹留
驄馬真傲吏翛然無所求晨趨玉階下心許滄江流
少別如昨日何言經數秋應知方外事獨往非悠悠

張子容

春江花月夜 二首

林花發岸口氣色動江新此夜江中月流光花上春

分明石潭裏宜照浣紗人
交甫怜瑤佩仙妃難重期
沉沉綠江晚惆悵碧雲姿
初逢花上月言是弄珠時

萬楚

采萸女

山陰柳家女九日采萸萸復得東隣伴雙為陌上姝
插花向高髻結子置長裾作性怕遲緩非關詫丈夫
平明折林樹日入返城隅俠客邀羅袖行人挑短書
蛾眉自有主年少莫踟蹰

包融

阮公嘯臺

荒臺森荆杞蒙龍無上路傳是古人跡阮公長嘯處
至今清風來時時動林樹逝者昔已遠昇攀想遺趣
靜然荒榛間久之若有悟靈光未歇滅千載知仰慕
登翅頭山題儼公石壁

晨登翅頭山山曛黃霧起却瞻迷向背直下失城市
瞰日啣東郊朝光生邑里掃除諸烟氛照出衆樓雉
青為洞庭山白是太湖水蒼茫遠郊樹倏忽不相侶
萬象以區別森然共盈机坐令開心胸漸覺落塵滓
此岩千餘仞結廬誰家子願陪中峯遊朝暮白雲裏

蔡希寂

同家兄題渭南王公別業

好閑知在家退跡何必深不出人境外蕭條江海心
軒車自來往空名對清陰川渙將釣玉鄉亭期散金
素暉射流漱翠色綿森林曾為詩書癖寧唯耕稼任
吾兄許微尚枉道來相尋朝慶老萊服夕閑安道琴
文章遙頌美寤寐增所欽既鬱蒼生望明時豈陸沉

沈頌

早發西山

遊子空有懷賞心杳無路前程數千里乘夜連輕馭

繚繞松篠中蒼茫猶未曙遙聞孤村犬暗指人家去
疲馬懷澗泉征衣犯霜露喧呼溪鳥驚沙上或騫翥

娟娟東岑月照耀獨歸慮

末疑有闕

韋鎰

經望湖驛

大漠無屯雲孤峯出亂柳前驅白登道頽失飛狐口
遙憶代王城俯臨恒山後纍纍多古墓寂寞為墟久
豈不固金湯終聞擊銅斗交懽初仗信接燕翻貽咎
埋寶賊夫人磨笄傷彼婦功成行且薄義立名不朽
莫慎纖微端其何社稷守身殘國遂亡此亦人君醜

賈至

贈裴九侍御昌江草堂彈琴

朔風吹踈林積雪在崖巘
鳴琴草堂響小澗清且淺
沉吟東山意欲去芳歲晚
悵望黃綺心白雲若在眼
送友人使河源

送君魯郊外下車上高丘
蕭條千里暮日落黃雲秋
舉酒有遺恨論邊無遠謀
河源望不見旌旆去悠悠

寓言二首

春草紛碧色佳人曠無期
悠哉千里心欲采商山芝
嘆息良會晚如何桃李時
懷君晴川上佇立夏雲滋

又

凜凜秋閨夕綺羅早知寒
玉碁調鳴杵始擣機中紈
憶昨別離日桐花覆井闌
今來思君時白露盈堦溥
聞有關河信欲寄雙玉盤
玉以委貞心盤以薦嘉飧
嗟君在萬里使妾衣帶寬

巴陵早秋寄荊州崔司馬吏部闕功曹舍人

謫居湘水渚再見洞庭秋
極目連江漢西南浸斗牛
滔滔盪雲夢淡淡搖巴丘
曠如臨渤澥窅疑造瀛洲
君山麗中波蒼翠長夜浮
帝子去永久楚詞尚悲愁
我同長沙行時事加百憂
登高望舊國胡馬滿東洲

死葉遍蓬蒿楚鄧無良疇獨攀青楓樹淚洒滄江流
故人西掖寮同扈岐陽蒐差池盡三黜踳躅各南州
相去雖地近不得從之遊耿耿雲陽臺迢迢王粲樓
跂予暮雲裏誰謂無輕舟

閑居秋懷寄陽翟陸贄府封丘高少府

今日霖雨霽颯然高館涼秋風吹二毛烈士如慨慷
憶昔皇運初衆賓值龍驤解中佐幕府脫劍昇明堂
郁郁被塵雲昭昭翼太陽鯨魚縱大壑鸞鷲鳴高崗
信矣草創時大階速賢良一言頓遭逢片善蒙恩光
我生屬盛明感激竊自彊崎嶇郡邑權連蹇翰墨場

大朝富英髦多士如珪璋盛才溢下位蹇步徒猖狂
閉門對群書机案在我旁枕席想遠遊聊欲浮滄浪
八月白露降玄蟬號枯葉艤舟臨清川迢遞愁思長
我有同懷友各在天一方離披不相見浩蕩隔兩鄉
平生霞外期宿昔共行藏豈無蓬萊樹歲晏空蒼蒼

自蜀奉冊命往朔方

途中呈帝左相文部
房尚書門下崔侍郎

胡羯亂中夏鑿龔忽南巡衣冠陷戎寇狼狽隨風塵
幽公秉大節臨難不顧身激昂白刃前濺血下沾巾
尚書抱忠義歷險披荆榛扈從出劍門登翼岷江濱
侍望挹侍郎公才標縉紳亭亭昆山玉皎皎無緇磷

顧惟乏經濟，扞牧陪從臣。永願雪會稽，仗劍清咸秦。
太皇時內禪，神器付嗣君。新命集舊邦，至德被遠人。
捧冊自南服，奉詔趨北軍。覲謁心載馳，違離難重陳。
策馬出蜀山，畏途上綠雲。飲啄叢菁間，棲息虎豹群。
崎嶇凌危棧，惴悚驚心神。峭壁上嶽岑，大江下沄沄。
皇風扇八極，異類懷深仁。元兇誘黠虜，肘腋生妖氛。
明主信英武，威聲共殊隣。誓師自朔方，旗熾何繽紛。
緹騎照白日，旄頭拂秋旻。將來盪滄溟，寧止蹴崑崙。
古來有逆難，否泰長相因。夏康纘禹績，代祖復漢勳。
于役各勤王，驅馳拱紫宸。豈惟太公望，往昔逢周文。

誰謂三傑才，功業獨殊倫。感此慰行邁，無為歌苦辛。

蕭穎士

早春過士嶺寄題硤石裴丞廳壁

出硤寄趣少，晚行偏憶君。依然向來處，官路溪邊雲。
茲路豈不劇，能無俗累紛。槐陰永未合，泉聲細猶聞。
彌嘆春罷酒，牽卑從此分。登高望城入，斜影半風薰。

仰荅常司業二首

關西一公子，年貌獨青春。被褐來上京，翳然聲未振。
中郎何為惜，倒屣驚坐賓。詞賦豈不佳，盛名亦相因。
為君奏此曲，此曲多苦辛。千載不可誣，孰謂今無人。

又

神龜在南國編邈湘川陰遊止蓮葉上歲時嘉樹林
毒虫且不近斤斧何由尋錯落負竒文熒煌耀丹金
江上萬里餘淮海阻且深獨抱貞素質不為寒暑侵
一逢盛明代應見通靈心

蒙山作

東蒙鎮海沂合杏百餘里清秋淨氛靄崖崿隱天起
余沒勞往還息徒暫攀騎將窮絕迹處偶得冥心理
雲氣雜虹霓松聲亂風水微明綠林際杳窅丹洞裏
仙鳥時可聞羽人邈難視此焉多深邃賢達昔所秘
子尚捐俗紛季隨躡遐軌蘊真道彌曠懷古情未已
白鹿凡幾遊黃精復溪似顧予尚牽纏家業重書史
少學務從師壯年貴趨仕方馳桂林譽未暇桃源美
歲暮期再尋幽哉羨門子

李華

咏史 五首

昂藏獬豸獸出自太平年亂代乃潛伏縱人為禍愆
常聞斷馬劍每壯朱雲賢身死名不滅寒風吹墓田
精靈如有在幽憤滿松烟

二

漢皇修雅樂乘輿臨太學三老與五更天王親割酌
一人調風俗萬國和且平單于驟款塞武庫欲銷兵
文物此朝盛君臣何穆清至今遺壇下如有簫韶聲
三
巢許在嵩穎陶唐不得臣九州尚洗耳一命安能親
緜遠數千祀丘中誰隱淪朝遊公卿府夕是山林人
蒲帛揚丕陋薜蘿為縉紳九重念入夢三事思降神
且設庭中燎寧窺泉下人

四

漢時征百粵楊僕將樓船幕府功未立江湖已騷然
島夷非敢亂政慕地仍偏得罪因懷壁防身輒控弦
三軍求裂土萬里詎聞天魏關心猶在旗門首已縣
如何得良吏一為裂方圓

五

秦滅漢帝與南山有遺老危冠揖萬乘幸得厭征討
當君逐鹿時臣等已枯槁寧知市朝變但覺林泉好
高卧三十年相看成四皓帝言翁甚善願見何不早
咸稱太子仁重義亦遵道側聞驪姬事中生不自保
蹇出商山雲謁來超洒掃東宮成羽翼楚舞傷懷抱
後代無其人戾園滿秋草

遊山寺 有龍潭

捨事入樵逕雲木深谷口萬壑移晦明千峯轉前後
巖然龍潭上石勢若奔走開坼秋天光崩騰萬雷吼
靈溪自茲去紆直互紛紛聽聲靜復喧色望無更有
冥冥翠微下高殿映杉柳昔時秦王女羽化年代久
日暮松風來簫聲生左右早窺神仙錄願結芝朮友
安得羨門方青囊繫吾肘

顏真卿

使過瑤亭寺有懷圓寂上人

真卿天寶九年尉醴泉丞過瑤亭寺圓寂上人院秩滿遷監察御史巡覆諸陵而上

人已離此寺大曆十三年春二月以刑部尚書謁拜昭陵慨然有懷其詞曰

上人居此寺不出三十年萬法元無著一心唯趣禪
忽紆塵外軫遠訪區中緣及爾不復見支提猶巋然

王縉

古別離

下堦欲離別相對映蘭叢含辭未及吐淚落蘭叢中
高堂靜秋日羅衣飄暮風誰能待明月迴首見床空

奚賈

詩僧皎然者嘗稱其詩有眠澗花自落步林鳥不飛溪谷何蕭條日入人獨行落日下平楚孤烟生洞庭皆佳句第不見其全篇

嚴陵灘下寄常建

日入溪水靜偶真此亦難乃知滄洲人道成仍釣竿
溪檝坐微月振衣生早寒紛吾誠獨往自速耽考槃
已息漢陰誚且同濠上觀曠然心無涯安問容膝安

謁李尊師

萬物返常性唯道貴自然先生容其微隱几為列仙
鍊魄閉瓊戶養毛飛洞天將知道遙久得道無歲年

趙微明

古離別二首

離別無遠近事歡情亦悲不聞車輪聲後會知何時
去日忘寄書來日乖前期縱知明當返一息千萬思

為別未幾日一日如三秋猶疑望可見日日上高樓
唯見分手處白蘋滿芳洲寸心寧死別不忍生離憂

古挽歌

文苑英華
作王烈詩

寒日蒿上明淒淒郭東路素車誰家子丹旌引將去
原下荆棘叢叢邊有新墓人生病長別此是長別處
曠野何蕭蕭風悲白楊樹

沈微

古興二首

蔓草自細微女蘿始天天夤緣至百尺榮耀非一朝
惠色高碧嶺流芳薄丹青如何摧秀木正為餘波漂

葦葉落巖跡英蕤從風飈洪柯不足恃况乃記陵若
長安富豪右信是天下根歲里笙歌發禁門冠蓋趨
攀雲無醜士唾地盡成珠日晏下雙闌烟花亂九衢
恩榮在片言零落亦須臾何意還自及曲池今已蕪

沈千運

贈史脩文

故人隔千里會面非別期握手於此地當歡返成悲
念離宛如昨俄已二十朞疇昔皆少年別來髮如絲
不道舊姓名相逢知是誰曩遊盡騫翥與君仍布衣
豈曰無其才命理應有時前路漸欲少不覺生涕洟

感懷弟妹

今日天氣暖東風杏荅拆筋力久不如却羨澗中石
神仙杳難准中壽稀滿百逐世多天傷喜見髮鬢白
杖藜竹樹間宛宛舊行跡豈非林園主却是林園客
兄弟可存半空為亡者惜冥冥無再期哀哀望松柏
骨肉能幾人年大自踈隔劉云可嘆性情誰免此與我不
相易唯念得爾輩時看慰朝夕平生茲已矣為外盡
非適

于逖

憶舍弟

衰門少兄弟兄弟唯兩人飢寒各流蕩感念傷我神
夏期秋未來孰知無他因不怨別天長但願見尔身
茫茫天地間萬類各有親安知尔與我乖隔同胡秦
何時對形影憤懣當共陳

野外作

老病無樂事歲秋悲更長窮郊日蕭索生意已蒼黃
小第髮亦白兩男俱不强有才且未達况我非賢良
幸以朽鈍姿野外老風霜寒鴉噪晚景喬木思故鄉
魏人宅蓬池結網佇鱸魴水清魚不來歲暮空彷徨

張彪

雜詩

富貴多勝事貧賤無良圖上德兼濟心中才不如愚
商者多巧智農者爭膏腴儒生未遇時衣食不自如
又與故交別他榮我窮居到門懶入門何況千里餘
君子有褊性矧乃尋常徒行行任天地無物强親踈

孟雲卿

今別離

結髮生別離相思復相保如何日已遠五變中庭草
渺渺天海途悠悠吳江島但恐不出門出門無遠道
遠道行既難家貧衣復單嚴風吹積雪晨起鼻何酸

人生各有志豈不懷所安分明天上日生死誓同觀
古別離
朝日上高堂離人怨秋草但見萬里天不見萬里道
君行本遙遠苦樂良難保宿昔憂同衾憂心常傾倒
含酸欲誰訴展轉傷懷抱結髮年已遲征行去何早
寒暄有時謝憔悴難再好人皆筭年壽死者何曾老
少壯無會期水深風浩浩

傷時二首

太空流素月三五何明明光耀侵白日賢愚迷至精
四時更變化天道有虧盈常恐今夜沒須臾還復生
劉涇溪云
子昂風調
徘徊宋郊上不見平生親獨立正傷心悲風來孟津
大方載群物生死有常倫虎豹不相食哀哉人食人
豈伊逢世運天道亮云云

傷懷贈故人

稍稍晨鳥翔浙浙草上霜人生早罹苦壽命恐不長
二十學已成三十名不彰豈無同門友貴賤易中腸
驅馬行萬里悠悠過帝鄉幸因絃歌末得上君子堂
衆樂互喧奏獨予偁笙簧坐中無知音安得神揚揚
願因高風起上感白日光

元結

貧婦詞

誰知苦貧夫家有愁怨妻請君聽其詞能不為酸悽
所怜抱中兒不如山下麀空念庭前地化為人吏蹊
出門望山澤回顧心復迷何時見府主長跪向之啼

春陵行 并序

癸卯歲漫叟授道州刺史道州舊四萬餘戶經賊
已來不滿四千大半不勝賦稅到官未五十日承
諸使徵求符牒三伯餘封皆曰失其限者罪至貶
削於戲若悉應其命則州縣破亂刺史欲焉逃罪

若不應命又即獲罪戾必不免也吾將守官靜以
安人待罪而已此州是春陵故地故作春陵行以
達下情

軍國多所須切責在有司有司臨郡縣刑法竟欲施
供給豈不憂徵歛又可悲州小經亂亡遺人實困疲
大鄉無十家大族命單羸朝食是草根暮食乃木皮
出言氣欲絕意速行步遲追呼尚不忍况乃鞭朴之
郵亭急傳符來往跡相迫更無寬大恩但有迫促期
欲令鬻男女言發恐亂隨悉使索其家而又無生資
聽彼道路言恐傷復誰知去冬山賊來殺奪幾無遺

所願見王官撫養以惠慈柰何重驅逐不使存活為
安人天子命符節我所持州縣忽亂亡得罪復是誰
逋緩違詔命蒙責固所宜前賢重守分惡以禍福移
亦云貴守官不愛能適時顧惟孱弱者正直當不虧
何人采國風吾欲獻此辭杜子美有覽道州元使君
春陵行兼賊退後示官吏

作二首志之曰當天子分憂之地效漢官
良吏之日今盜賊未息知民疾苦得結董
十數公落落然參錯天下為邦伯萬物吐
氣天下少安可待矣不意復見此且體制
微婉頌
挫之詞

賊退示官吏 并序

癸卯歲西原賊入道州樊煞掠幾盡而去明年賊

又攻永破郡不犯此州邊鄙而退豈力能制敵歟
蓋蒙其傷怛而已諸使何為忍苦徵歛故作詩一
篇以示官吏

昔歲逢太平山林二十年泉源在庭戶洞壑當門前
井稅有常期日晏猶得眠忽然遭世變數歲親戎旃
今來典所郡山夷又紛然城小賊不屠人貧傷可憐
是以陷隣境此州獨見全使臣將王命豈不如賊焉
今彼徵歛者迫之如火煎誰能絕人命以作時世賢
思欲委符節引竿自刺船將家就魚麥歸老江湖邊

登九疑第二峯

九疑第二峯其上有仙壇松杉映飛水蒼蒼在雲端
何人居此處云是魯女冠不知幾百歲燕坐餌金丹
相傳羽化時雲鶴滿峯巒婦人有高風相望空長嘆

獨孤及

奉同徐侍郎五雲溪新亭重陽集作

萬峯蒼翠色雙溪清淺流已符東山趣况值江南秋
白露天地肅黃花門館幽山公惜美景肯為芳樽留
五馬照池塘繁絃催獻酬州臨風孟嘉帽乘興李膺舟
騁望傲千古當歌遺四愁豈令永和人獨擅山陰遊

海上寄蕭五

朔風剪塞草寒露日始結客行屆瀛壖歸思坐莫節
驛樓見萬里延首望遼碣遠海入大荒平蕪際窮髮
舊國在夢想故人且胡越契濶阻風期荏苒成兩別
海西望京口兩地各天末日窮南雲盡唯見飛鳥滅
青塵未易得何以慰飢渴

山中春思

懶祭川水大人家春日長獨謠晝不暮搔首慙年芳
靡草知節換含葩向新陽不嫌三逕深為我生池塘
亭午井甃閑雀聲響空倉花落沒屐齒風動群木香
歸路雲水外天涯杳茫茫獨倦萬里心深入山鳥行

芳景勿相迫
春愁未遽忘

題恩禪寺上方

溪口聞法鼓
停橈登翠屏
攀雲到金界
合掌開禪扃
鬱律衆山抱
空濛花雨零
老僧指香樓
云是不死亭
眇眇干越路
茫茫春草青
遠峯噴百谷
繚繞馳東溟
目極想何在
鏡照心亦冥
下視三界狹
但聞五濁腥
山中有良藥
吾欲隳天刑

觀海

北登渤海島
迴首秦東門
誰戶造物巧
鑿此天池源
瀕洞吞百谷
周流無四垠
廓然混茫際
望見天地根

白日自中吐
扶桑如何捫
超遙蓬萊峯
想像金臺存
秦帝昔經此
登臨異飛揚
旌百神會望
日群山奔
徐福竟何成
羨門徒空言
唯見石橋足
千年潮水痕

丁仙芝

江南曲

長干斜路北
近浦是兒家
有意來相訪
明朝出浣紗
發向橫塘口
船開值急流
知郎舊時意
且請攏船頭
昨暝逗南陵
風聲波浪阻
入浦不逢人
歸家誰信汝
未眠已成粧
乘潮去茫茫
因從京口渡
使報邵陵王
始下芙蓉樓
言發瑯琊岸
急為打船開
惡許傍人見

沈如筠

寄張徵古

寂歷遠山意微冥半空碧綠蘿無冬春彩烟竟朝夕
張子海內奇耐為岩中客聖君勞寔夢想安得老松石
吳象之

陽春歌

簾低曉露濕簾捲鶯聲急欲起把箜篌如疑彩絃澁
孤眠愁不轉點淚聲相及淨掃堦上花風來更吹入

楊諫

贈知己

江南折芳草江北贈佳期江濶水復急過江常苦遲
蘋白蘭葉青恐度先香時美人碧雲外寧見長相思

林琨

夕次葉陰亭

清晨孤亭裏極目對前岑遠與水天合長霞生夕林
蒼然平楚意香靄半秋陰落日川上盡闕城雲外深
方予事岩壑及此欲抽簪詩就蓬山道還茲契宿心

談戡

清溪館作

指途清溪裏左右唯深林雲蔽望鄉處雨愁為客心

遇人多物役聽鳥時幽音何必滄浪水庶茲浣塵襟

劉復

寺居清晨

高枕對曉月衣巾清且涼露華朝未晞滴瀝含虛光
隔竹聞汲井開扉見焚香幽心感衰病結念依法王
青冥早雲飛杳靄空鳥翔此情皆有釋悠然知所忘

出東城

步出

一作步

東城門獨行已徬徨伊洛泛清流密林含

朝暘芳景雖可矚懷憂在中腸人生能幾何苒苒隨
流光願得心所親罇酒坐高堂一為浮沉隔會合殊

未央雙戲水中鳧和鳴自翱翔我無此羽翼安可以
比方

經楚城

日沒途且長遊子欲涕零荒城無人跡秋草飛寒螢
東南古丘墟莽蒼馳郊垆黃雲晦斷岸枯井臨崩亭
昔人竟何之窮泉獨冥冥蒼苔沒碑板朽骨無精靈
俛仰寄世間忽如流波萍金石非汝壽浮生等臊腥
不如學神仙服食求丹經

楊浚

題武臨草堂

草堂列仙樓上在青山頂戶外窺數峯堦前對雙井
雨來花盡濕風度松初冷登棧行不疲入溪語彌靜
未能去塵服兼欲事金鼎正直心所存諂諛長自省
適知幽遁趣已覺煩慮屏更愛雲林間吾將卧南穎
戴休珽

古意

窮秋朔風起滄海愁陰漲虜騎掠河南漢兵屯灞上
羽書驚沙漠刀斗喧亭障關塞何蒼茫邊烽遞相望
弱齡負雄節俠客多招訪投筆棄書生提戈逐飛將
宋昱

晚次荆江

孤舟大江水水涉無昏曙雨暗迷津時雲生望鄉處
漁翁閑自樂樵客紛多慮秋色湖上山歸心日邊樹
徒稱竹箭美未得楓林趣向夕垂釣還吾從落潮去

國

